



Dewan Rakyat Lulus RUU Suruhanjaya Perkhidmatan Air Negara (Pindaan) 2023

Oktober 12, 2023 @ 7:29pm

KUALA LUMPUR: Persidangan Dewan Rakyat hari ini meluluskan rang undang-undang (RUU) bagi meminda Akta Suruhanjaya Perkhidmatan Air Negara (SPAN) 2006 (Akta 654) yang bertujuan memperkemas tadbir urus dan memperkuuh integriti suruhanjaya terbabit.

RUU SPAN (Pindaan) 2023 itu diluluskan dengan lebih suara bersetuju selepas 25 Ahli Parlimen mengambil bahagian pada sesi perbahasan.

Terdahulu Timbalan Menteri Sumber Asli, Alam Sekitar dan Perubahan Iklim (NRECC), Datuk Seri Huang Tiong Sii, berkata selepas lebih 16 tahun Akta 654 dikuatkuasakan, beberapa ruang penambahbaikan dikenal pasti bagi memastikan ia sentiasa relevan dengan perkembangan semasa dan keperluan masa hadapan industri perkhidmatan air negara.

Ini termasuk memantapkan tadbir urus SPAN agar lebih efisien dan meningkatkan keupayaan kawal selia agar penguatkuasaan yang lebih berkesan dapat dilaksanakan.

"Sejajar dengan inisiatif global dan nasional dalam merealisasikan pembangunan lestari, dasar-dasar baharu berdasarkan ekonomi kitaran, kecekapan penggunaan, perlindungan pengguna dan penglibatan awam dan swasta telah diperkenalkan.

"Oleh yang demikian, penjajaran akta ini dengan dasar-dasar baharu penting untuk memastikan ia sentiasa relevan dengan perkembangan semasa serta keperluan masa hadapan industri perkhidmatan air negara," katanya ketika membentangkan RUU itu bagi bacaan kali kedua.

Tiong Sii berkata, melalui RUU itu juga, tempoh jawatan anggota suruhanjaya dipendekkan daripada 10 tahun kepada enam tahun.

"Tujuan pindaan ini adalah bagi mewujudkan fleksibiliti dalam urusan pelantikan anggota suruhanjaya yang berpengalaman dan tidak terikat dengan pelantikan sedia ada bagi suatu tempoh yang panjang," katanya.

Persidangan bersambung esok untuk pembentangan Belanjawan 2024 oleh Perdana Menteri, Datuk Seri Anwar Ibrahim. – BERNAMA